


«Nus savevan da nuot auter». Propi?

DA BERNARD CATHOMAS

■ **Cur che nus vegls raquintain da nosa vita e da las stentas da pli baud vegn savens la construcziun: «Ins saveva da nuot auter». Savev'ins vairamain da nagut auter?** Jau ma regord als onns 1950. Nus vesevan ils esters che vegnivan e faschevan vacanzas en las abitaziuns, nua che la gliעד dal vitg viveva il rest da l'onn. Nus vesevan ils «fandfinders» en lur camps da stad en il «Flablager» e l'enviern las mattas da la Belgia en ina chasa da vacanzas a Breil, vestgidas e fridasas tut auter che nossas conscolaras.

Il bab raquintava da quai ch'el legeva en la gasetta tudestga ed en ses cudeschs. In pèr famiglias avevan in radio ed udivan tge che gieva sin il mund. Quasi mintgin aveva augs ed ondas en la Bassa che vivevan ina vita differenta da quella en Surselva. Tut ils umens avevan fatg militar e mintg'otra dunna era stada en piazza a l'ester, scolasts gievan durant ils sis mais libers giu en la Bassa a lavarar. Tut che saveva ch'i deva autras cundiuziuns da viver che quellas che nus avevan da lez temp tar nus.

Pertge pia «ins saveva da nuot auter», sch'ins aveva er autras letgas che da star, nua ch'ins era e far quai ch'era gia adina vegnì fatg. «Ins saveva da nuot auter» vul dir: Nus vulevan viver sco ins aveva adina fatg quai tar nus. Nus na vulevan ir davent e laschar encrescher per ils noss, per chasas e pradas e muntognas. Nus vulevan nagut auter, era sche quai che nus avevan era plain fadias.



©HANS STRICKER

Differentas pussaivladads d'eleger co passentar la vita hai adina dà per tgi che vuleva e ristgava da las prender e pajar il pretsch persuerter. Dentant: San ins insumma discurrer dad «eleger» dal mument ch'ins vegn sfurzà da las circumstanzas u dals agens limits da prender u

laschar? Per exempel mes bab: Suenten l'emprendissadi da roder a Cuira ha el elegì dad ir in onn sin viadi da mastergnant e lavarar en differentas firmas da roder en Svizra tudestga. Pli tard raquintava el ch'el avess da lez temp – igl er ils 1930 – savì eleger dad ir tar la viafier e restar en

la Bassa. El laschava encrescher ed ha perquai elegì da returnar e fundar ina pitschna firma da roder a Breil en Surselva.

Ils 1950, cur che las rodas da gummi han remplazzà quellas en lain, ha el stuì serrar ses lavuratori e lavarar sin plazzals da construcziun. La stad geva el trais mais

ad alp cun nus buobs. Quels trais mais cumpensavan quai ch'el na pudeva betg vairamain eleger. Er sch'el saveva ch'i avess anc dà autras vias. Almain teoreticamain.

L'autur è pensiunà activ.